



Komunikadu Imprensa

17 Abril 2015

Ministru Estadu, Koordinator Asuntu Administrasaun Estadu no Justisa no Ministru Administrasaun Estatal apoiu alterasaun Kódigu Penál ba Asuntu Insestu

Iha 15 Abril 2015, JSMP no ALFeLa hamutuk ho grupu sosiedade sivíl apoiu alterasaun ba Kódigu Penál ne'ebé envolve Fokupers, Pradet, Mane ho Vizaun Foun, Ba Futuru, Fundasaun Alola, Rais Hadomi Timor Oan (RHTO), no Ba Futuru hasoru malu ho Exelénsia Ministru Estadu, Koordinator no Asuntu Administrasaun Estadu no Justisa no Ministru Estatal, Sr. Dr. Deonísio Soares Babo iha ninia servisu fatin. Audiénsia ne'e maisumentu dura oras ida ho balun hosi planu antes ba minutu tolunulu nia laran.

Audiénsia ne'e ho objetivu atu apresenta preokupasaun no deskobremetu sira ne'ebé JSMP no ALFeLa hetan hosi rezultadu servisu monitorizasaun no akompañamentu legál iha prosesu julgamentu iha tribunál sira, liuhosi relatóriu submisaun ho titlu "Hadiak Kódigu Penál atu proteje diak liu feto no labarik".

JSMP no ALFeLa deskobre katak iha provizaun lubuk ida iha Kódigu Penál no Lei Kontra Violénsia Doméstika liu-liu ba asuntu feto no labarik ne'ebé persiza halo alterasaun no inkorpora artigu espesifiku ba asuntu insestu ne'ebé sem hare ba iha vítima nia idade no konsentimentu.

Razaun tanbasa JSMP no ALFeLa hamutuk ho grupu apoiu alterasaun ba Kódigu Penál propoin atu kria artigu espesifiku ba asuntu insestu, tanba:

1. Atualmente, Kódigu Penál aplikavel ladun forte hodi luta kontra insestu. Bainhira ema joven ida ho idade liu tinan 14 hetan abuzu seksuál hosi membru familia ne'ebé besik, prokurador tenke prova arguidu uza forsa ka ameasa grave kontra vítima no vítima tenke prova katak nia halo rezistencia hasoru arguidu.
2. JSMP no ALFeLa observa katak defisil atu prova forsa bainhira arguidu ne'e membru familia ne'ebé besik no iha presaun makas ba vítima hodi fó depoimentu, ka tanba sente moe no tauk atu fó ninia depoimentu iha tribunál.

Rua setubal, Colmera, Dili Timor Leste

PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

3. Dala barak, arguidu la uza forsa ka ameasa tanba nia aproveita ninina pozisaun autóridade familial hodi halo abuzu seksuál hasoru vítima iha maneira koersivu. Vítima dalaruma la hatene atu dehan lae/labele, atu hetan ajuda hosi ne'ebé, ka tauk katak arguidu sei halo abuzu hasoru ninia alin/biin rasik se sira la aseita abuzu refere.
4. Tanba ne'e JSMP no ALFeLa hanoin katak importante atu define artigu espesifiku iha Kódigu Penál, ne'ebé aplika sem haree ba uza forsa ka ameasa, nune'e tribunál tenke kondena efetivamente no fo kastigu ba arguidu. Ida-ne'e bele prevene possibilidade ba arguidu foun ka reinsidénsia ba krime, no ajuda redus numéru sofrémentu vítima ba abuzu seksuál iha uma.

Audiénsia ne'e, hetan reajem pozitivu husi Exelénsia Ministru Dr. Deonísio Soares Babo, no agrdese ba esforsu husi sociedade sivíl sira liu-liu tanba bele deskobre lakunas no problema ne'ebé ita nia Tribunál sira hasoru. Faktu deskobrémentu hirak ne'e nu'udar parte ida bele ajuda vítima sira bele hetan justisa ida ne'ebé justu. Durante diskusaun ne'e Ministru promote ba sociedade sivíl sira katak nia sei apoiu esforsu hirak ne'e liu-liu atu halo alterasaun ba Lei Kódigu Penál.

Maske nune'e Ministru husu ba grupo sociedade sivíl sira atu fundamenta razoens filosofia tanbasa persiza define artigu espesifiku kona-ba incestu no oinsa atu asegura katak artigu ne'e refleta folosofia justisa ida ne'ebé justu iha comunidade. Ministru mós rekomenda atu iha diskusaun barak liu ne'ebé involve autór judisiáriu sira no enkoraza sira atu hare ba referensia dutrina sira hosi peritu legál no jurisprudensia nu'udar fontes legál sira ne'ebé iha ona fatin seluk.

Relasiona ho rekomendasaun hirak ne'ebé Exelénsia Ministru propoin, grupo sociedade sivíl sira promote sei desenvolve argumentu badak ida liu-liu atu esplika kona-ba konseitu no definisaun husi incestu ne'e rasik.

Audiénsia ne'e ensera ho entrega relatóriu kona-ba "Hadiak Kódigu Penál hodi proteje diak liu feto no labarik" ba Exelénsia Ministru Sr. Dr. Deonísio Soares Babo.

Tuir planu audiénsia hanesan sei halo mós ho Exelénsia Ministru Estadu Koordinator Asuntu Sosiais no Ministru Edukasaun, Sr. Fernando Lasama de Araújo.

Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org